

Un jiu ta recordá su tata

Awe exáctamente un siglo cu mi Papa, Mario Eusebio Harms, a nace.

Daddy, manera nos tabata yamé, a nace na Boneiro caminda su tata tabata traha como Vuurtorenwachter.

Cu su diezseis aña el a bai traha riba un balander cu tabata nabegá entre Boneiro, Corsow y Aruba.

Cu tempo el a graduá pa bapornan mas grandi di Red "D" Line y otronan. Durante promé guerra mundial Mario Harms a haci hopi biahe entre Merca y Europa. Durante un di e biahenan su barco di chiripa a scapa di un mina den lamá. Den bahía di San Juan, Puerto Rico, e tabatin menos suerte. Aya e boiler-nan a explotá y e barco a sink. Daddy mes a logra scapa su bida, landando pa tera, pero el a perde tur locual e tabatin. Asina mes Daddy a keda nabegá te dia cu el a casa cu Catherine Wever, jiu muher di e capitan tempo cu e tabata nabegá abordo di e balander. Pero Daddy a keda cu un amor grandi pa tur cos marítimo y un di e momentonan mas feliz den su bida tabata dia cu un ruman di mi a hibé cruza Panama Canal den un bapor di pasahero.

Na San Juan, Daddy a logra di salba su mes pasobra e tabata un bon atleta. Landamento, e deporte cu a salba su bida, tabata esun cu el a practicá di mucha y a sigui practicá te na su último añanan. Tempo mi tabata chiquito, nos no tabatin auto pa

bai beach pero tur Diadomingo mainta Daddy tabata cana hibami "Henchi Croes" y aya el a siñami landa. Hopi aña despues, tempo cu ya e tabatin mas cu 75 aña, ainda e tabata gusta bai beach banda di POVA y pasa oranan largo den laman.

Mario Harms tabata miembro di Vitesse, e promé equipo di futbol cu a wordo formá na Aruba, y el a keda semper cu un stimacion pa e deporte aki. Ainda mi ta corda con tempo mi tabatin apenas ocho of nueve aña, e tabata hibami bai wak wega na Wilhelmina Park. Durante e añanan cu mi ruman a hunga pa RCA, Daddy no tabata perde un di su weganan. Pero Daddy no tabata un fanático di futbol só. Tempo cu mi rumannan y ami a cuminsá hunga baseball, el a siña e reglanan di e deporte aki pa e por a sigui y comprondé e weganan y e hugadanan. Asina tambe el a siña softball, basketball y e tabata gusta bai wak tur e weganan aki, especialmente ora cu un di su jiunan tabata participá.

Apesar di a bai solamente cuater klas di Lagere School, Mario Harms tabata gusta lesa masha hopi. Bibando na Merca, despues cu el a casa, Daddy a logra educá su mes den varios ofishi y asina e por a haya un job na Lago e mesun dia cu el a yega Aruba atrobe na 1929. El a traha 25 aña na Lago y a logra subi te foreman di Metal Trades.

Durante segunda guerra mundial, Daddy tabata masha interesá den e desarroyonan di e guerra. E tabata lanta mardugá pa e por scucha noticianan di BBC di London promé cu e bai trabao. E tabata haya revistanan Mericano regularmente y asina semper e tabata na altura di tur locual tabata pasando rond mundo.

Mi ta corda con mi tabata admirá Daddy pa su conocimiento di e nombrenan di casi tur e lidernan, no solamente di e aliadonan, pero tambe di e fascistanan. Hopi aña despues, tempo cu mi tabata studia na Universidad na Merca y tambe tempo mi tabata traha na Libya, Daddy a usa su conocimiento di reportahe y tabata scirbimi regularmente pa lagami sa kiko tabata pasando aki na Aruba. Te awe mi ta corda



con e tabata mezcla e noticianan cu su comentarionan pica y pret. Hopi reporteronan profesional lo no por a haci un bon trabao asina.

Na aña 1972 mi a wordo yamá for di Libya pasobra Daddy mester a operá pa cancer. Despues di operacion e tabata recuperá satisfactoriamente pero despues di un siman di repente el a bira malo un atardi y e mesun anochi laat, cu su cabez den

mi brazanan, daddy a hala su último rosea. Ta casi 22 aña cu Daddy a bai laga nos, pero awe mi ta recordé cu admiracion pa tur locual el a logra den su bida, apesar di tin asina poco recurso y educacion, y cu aprecio pa e amor cu semper e tabatin pa su famia. □

CRH.